

## OBRAĆANJE DIREKTORA CENTRA ZA KULTURU NA SVEČANOJ SJEDNICI UPRAVNOG ODBORA, MENADŽMENTA I ZAPOSLENIH U CENTRU ZA KULTURU

Dame i gospodo, poštovani predstavnici zakonodavne i izvršne vlasti Bosansko podrinjskog kantona i općina u njegovom sastavu, predstavnici privrednih kolektiva, javnih prduzeća i ustanova...

Dragi prijatelji,

Velika su i čast i zadovoljstvo da mogu da vam poželim dobrodošlicu na ovu svečanu sjednicu koju održavamo s povodom koji sve nas istinski raduje.

Jer, 60 godina Javne ustanove Centar za kulturu jeste u svakom pogledu naš zajednički jubilej.

Šezdeset godina postojanja i aktivnog rada JU Centar za kulturu Goražde čini nas prije svega ponosnima i još više motivisanim za poboljšanje rada ove ustanove. Obzirom da je Centar za kulturu glavni kreator i generator kulturno-umjetničkog života na području Bosansko-podrinjskog kantona, te da aktivno funkcioniše šest decenija, ovaj jubilej je itekako važan za promociju kulture i ove javne ustanove.

Aktivnosti i djelovanje Centra za kulturu Goražde od velikog su značaja u ukupnom razvoju kulture Općine Goražde, Bosansko-podrinjskog kantona, BiH, regije i šire. Osnovan je kao Centar koji će promovisati, graditi i njegovati kulturu našeg društva. To čini punih 60 godina!

Obilježavanje ovog značajnog jubileja je prilika da se predstave kulturno-umjetnički sadržaji i aktivnosti JU Centar za kulturu uz prigodan program povodom ove manifestacije.

Najvećim dostignućem Centra za kulturu Goražde u proteklim godinama smatram afirmaciju kulturno-umjetničkog života i djelovanja u lokalnoj zajednici i ostvarenoj saradnji sa privrednim subjektima, javnim ustanovama, obrazovnim ustanovama, saradnja sa vrtićima, školama, fakultetama, bibliotekama, stručnim saradnicima, građanskim i volonterskim udruženjima, te međunarodnoj saradnji sa drugim državama.

Također, veliko dostignuće ove ustanove ogleda se i kroz organizaciju i provođenje svih značajnih događaja na području BPK Goražde čiji je organizator JU Centar za kulturu Goražde. Pored redovnih aktivnosti, organizovanja manifestacija koje su uvedene u kalendar redovnih aktivnosti, Centar aktivno radi na proširenju djelatnosti i podrške drugim javnim ustanovama što je od velikog značaja za našu zajednicu i javnost. Ono čime se posebno možemo pohvaliti jeste otvaranje historijskog muzeja čija je osnovna funkcija očuvanje kulturnog i historijskog nasljeđa koje posjedujemo i koje smo obavezni sačuvati od zaborava te ostaviti u amanet budućim generacijama. Urađena je prva postavka u muzeju „Ratna izložba“ na dan obilježavanja općine BPK Goražde. Internacionalni Festival prijateljstva je kulturna manifestacija tradicionalnog i internacionalnog karaktera koju organizujemo zajedno sa Općinom Goražde već devetnaest godina za redom te na taj način održavamo prijateljstvo sa zemljama širom svijeta. Tu su još kulturno-književna manifestacija „Dani Isaka Samokovlije-Sunce nad Drinom“ Goražde-Sarajevo-Fojnica, kulturna manifestacija „Aprilski dani kulture-Goraždansko proljeće“, Internacionalni dječiji festival „Šta se pjesmom sanja“, Drinske večeri poezije, Djeca pjevaju sevdalinke, Hitovi zabavne muzike, Hitovi narodne muzike i druge manifestacije.

Gradska biblioteka posjeduje raznovrsan knjižni fond preko 45 000 knjiga i 24 000 naslova sa odjelom za odrasle, djecu i zavičajni kutak koji njeguje segment kulture i umjetnosti. Također važno je spomenuti, da sklopu gradske biblioteke ima odjel za slijepa i slabovidna lica.

U okviru ove ustanove izlaze novine „Glas Goražde“ koj se štampaju od davne 1993. godine i jedini su printani medij na području BPK-a Goražde, u martu ove godine izašao je 200-ti broj naše novine. Ansambl narodnih igara i pjesama punih 20 godina svoje aktivnosti provodi u okviru JU Centar za kulturu s ciljem da afirmiše stanovništvo ovih prostora iskazujući njihov dar za ljepotom, njihovu viziju i poglede na život. Osnovna misija Ansambla su njegovanje i razvoj kulture naših naroda, kao i očuvanje kulturne baštine i običaja naroda i narodnosti BiH..

Pri Ansamblu djeluju slijedeće sekcije:

- „A“ – Ansambl /reprezentativni, prezentacijski/,
- „B“ – Dječiji Ansambl /starosti od 10-16 godina/

- „C“ – Pripremna grupa od 4 do 10 godina
- „D“ – Sekcija za očuvanje tradicije i običaja naroda BiH

Pri Centru za kulturu djeluje i Muzička produkcija sa ciljem okupljanja što većeg broja djece i omladine i njihovo animiranje za aktivno učešće u muzičkim i drugim kulturnim manifestacijama koje organizuje Centar .

Od prije tri godine pri Centru formiran je književni klub „ISAK“ koji ima za cilj da okuplja mlade pisce i pjesnike koji žele da iskažu svoj književni talenat kroz pisanu riječ. Pored kulturnih dešavanja i aktivnosti koje provodi Centar za kulturu Goražde, važno je pomenuti da se aktivno radi na infrastrukturi, adaptaciji i uređenju objekta zgrade Centra.

Svakako da je obilježavanje ovog jubileja rada i djelovanja CzK velika radost za sve zaposlenike, a naravno i za Grad Goražde. Sve ove godine Centar kulturno i umjetnički djeluje i pruža građanima edukaciju kroz različite programe neformalnog obrazovanja te stvaranja pozitivnih navika kod svih kategorija građana u smislu aktivnog odnosa u društvu. S druge strane, dosadašnji uspjeh obavezuje da radimo još više i da aktivnije utičemo na kulturno-umjetnički razvoj našeg društva.

Ovu priliku iskoristit ću da se zahvalim Općini Goražde, Vladi BPK, Ministarstvu za obrazovanje, nauku, kulturu i sport i drugim javnim i privatnim subjektima na zajedničkoj saradnji i potpori za realizaciju projekata Centra za Kulturu Goražde, i nadam se da ćemo nastaviti i dalje surađivati uspješno kao i do sada. Zajedničkim snagama možemo da gradimo našu kulturu i da kulturnu svijest naših građana podignemo na još veći nivo. Svjedoci ste široke ponude kulturnih dešavanja u Centru za sve uzraste i generacije naših građana. Ovim putem ih pozivam da se u buduće odazovu i posjete kulturna dešavanja u većem broju nego što je to bio slučaj do sada. Uputite svoju djecu u Centar za kulturu umjesto u kafane i kafiće, skolonite ih sa ulice i uputite u kulturne i sportsko-rekreativne ustanove. U ovom kontekstu, Centar za kulturu će se posvetiti radu na projektima koji će uključiti veliki broj učesnika, naših građana u cilju njihovog aktivnog učešća i življenja kulture. Nama je najveće zadovoljstvo raditi sa djecom i organizovati dječije manifestacije, moram istaći da imamo izuzetno dobru saradnju sa školama i vrtićima.

Cilj nam je imati što kvalitetnije poslovanje, a to želimo postići konstantnim ulaganjem u obrazovanje i stručno usavršavanje uposlenika, te angažovanje stručnih vanjskih saradnika. Također centar želi povećati broj i kvalitet ponude predstava, koncerata, sve u svrhu privlačenja većeg broja posjetilaca. Obaveza nam je stvoriti bolje materijalne i nematerijalne uslove rada uz nabavku nove informatičke opreme i pratećih programa, opreme za Muzičku produkciju kao i opreme za produkciju filmova /kinoprojektor/, opremu za Muzej. Stvoriti bolje uslove rada u adaptaciji i uređenju objekta. Naš je cilj završiti kompletnu sanaciju krovne konstrukcije, završiti uređenje prostora Zavičajnog muzeja, adaptirati Ljetnu pozornicu, adaptirati dom mladih i nus prostorije, te zamijeniti stolariju i izvršiti utopljavanje zgrade.

I u narednim godinama bićemo u potpunosti posvećeni našoj misiji, a dragocjena kao i do sada biće nam vaši pažnja i potpora.

Hvala Vam!